



Broj: 02-04-82/23

Datum, 30.01.2023. godine

ZAPISNIK
sa 23. redovne sjednice 7. saziva
Općinskog vijeća Doboj Istok

Dvadesettreća redovna sjednica 7. saziva Općinskog vijeća održana je dana 26.01.2023. godine u zgradi općine Doboj Istok u Klokočnici sa početkom u 10,00 sati.

PRISUTNI: 16 vijećnika, Kemal Bratić, općinski načelnik, Omer Hadžić, sekretar općine, Abdulah Hrnjičić, ovlašteno lice da zamjenjuje pomoćnika općinskog načelnika za prostorno uređenje, Samir Mujkić, ovlašteno lice da zamjenjuje pomoćnika općinskog načelnika za poduzetništvo i financije, Sulejman Delić, pomoćnik općinskog načelnika za civilnu zaštitu, Siniša Petrović, predstavnik OSCE-a, te Fahrudin Kurtović, predstavnik RTVTK.

ODSUTNI: Senada Džanić, vijećnica SBB.

Sjednicu je otvorio i vodio predsjedavajući Općinskog vijeća, Nusret Dautović.

Nusret Dautović, predsjedavajući Općinskog vijeća: „Poštovani vijećnici, uvaženi načelnice, pomoćnici načelnika, mediji, predstavnice OSCE-a sve vas srdačno selamim i pozdravljam. Prije nego otvorim 23. sjednicu 7. saziva Općinskog vijeća zamolio bih tehničku službu da utvrdi kvorum. Pošto imamo kvorum, prisutno je 16 vijećnika, a odsutna je Senada Džanić opravdano, možemo da nastavimo sa radom. Otvaram 23. redovnu sjednicu 7. saziva Općinskog vijeća Doboj Istok.“

USVAJANJE ZAPISNIKA SA PRETHODNE SJEDNICE OPĆINSKOG VIJEĆA

Nusret Dautović, predsjedavajući Općinskog vijeća: „Dobili ste Zapisnik sa 22. redovne sjednice 7. saziva Općinskog vijeća Doboj Istok. Ima li neko primjedbi na zapisnik? Ukoliko nema, ko je za ovakav zapisnik?“

Glasanje: ZA – 16, PROTIV – 0, UZDRŽANIH – 0.

VIJEĆNIČKA PITANJA

Nusret Dautović, predsjedavajući Općinskog vijeća: „Ima li vijećničkih pitanja?“

Kemal Skopljak, predsjednik kluba vijećnika SBB-BPS: „ Da pozdravim sve prisutne. Ja imam jedno vijećničko pitanje, a odnosi se na sljedeće: Gospodine načelnice, da li je tačno da ovih dana namjeravate zatvoriti matični ured u Mjesnoj zajednici Brijesnica Velika, te isti prebaciti u Mjesnu zajednicu Klokočnica? Ako je to tačno molim vas da građanima Mjesne zajednice Brijesnica Velika objasnite zašto to namjeravate da uradite i zašto smatrate da bi takav čin bio opravdan. Umjesto da

sve službe budu što bliže na usluzi građanima ovom odlukom vi ih udaljavate. Napominjem vas da je u prethodnom periodu iz Mjesne zajednice Brijesnica Velika već izmješteno niz službi kao što su opća uprava, boračko invalidska zaštita, sjedište Općinskog vijeća, služba za prostorno uređenje i katastar, a sve službe su prebačene bez volje i saglasnosti građana Mjesne zajednice Brijesnica Velika. Ukoliko ponovo donesete odluku da i ovu službu prebacite bez saglasnosti građana Mjesne zajednice Brijesnica Velika očekujte reakciju istih koju ću, ako bude trebalo, lično da organizujem i predvodim.“

Emira Karić, predsjednica kluba vijećnika SDP: „ Pozdravila bih sve prisutne. Ja nemam vijećničko pitanje, ali želim još jedanput da vas upozorim da promijenite Poslovnik o radu kada su u pitanju vijećničke inicijative. Evo imamo predstavnika OSCE-a i ja sam ga takođe upoznala. Znači mi smo jedna jedina općina u kojoj vijećnici nemaju pravo da podnose vijećničke inicijative, tako da uskoro omogućite da promijenimo Poslovnik i nama dozvolite ono što je dozvoljeno i u ostalim općinama.“

Hasan Hasančević, predsjednik kluba vijećnika SDA: „ Uvaženi načelnice, dopredsjedavajući, predsjedavajući, kolegice i kolege, predstavnici medija i OSCE-a želim iskreno da vas poselamim i pozdravim i da zaželim dobar i konstruktivan rad na današnjoj sjednici. Uvažena kolegice Emira, radi se o replici ili bilo čemu. Mi smo do sada razgovarali o ovoj temi, o vijećničkim inicijativama i niste se udostojili vi kao vijećnica da predložite bilo kakvu promjenu. Dakle, ne možete očekivati da neko drugi to radi nego da vi to radite i da to bude kako se zapovijeda.“

Emira Karić, predsjednica kluba vijećnika SDP: „ Po struci nisam pravnik, ali kako i na koji način da predložim kada nemam pravo na vijećničku inicijativu, samo recite taj kanal, da li amandman na nešto što nije tačka dnevnog reda. Ja se ne želim držati nezakonitih i nepravilničkih stvari. Evo ja ću predložiti, napisat ću amandman mada nisam pravnik, ali napisat ću samo da kažete pod kojom tačkom dnevnog reda ili da uputim komisiji. Može i tako, uputit ću Komisiji za statut i propise i vrlo brzo ćete dobiti prijedlog amandmana, odnosno člana u Poslovniku o radu koji će nam omogućiti upravo te vijećničke inicijative. Mislim da će to biti presedan ako to opozicija radi i zahvaljujem se ako to opozicija uradi, a vi to usvojite naravno.“

Hasan Hasančević, predsjednik kluba vijećnika SDA: „ Uvažena kolegice, ja koliko znam vama je treći mandat kao i meni i treba da znate kako doći do promjene. Znači imate službe koje su na raspolaganju i imamo vijećničke komisije koje, hajmo reći, rade, jer ona koju ja predvodim radi, a neću u druge puno zavirivati. Znači, bujrum imate komisiju, imate službu pri Vijeću, pa konsultujte se.“

Emira Karić, predsjednica kluba vijećnika SDP: „ Nije problem, zahvaljujem se, ali molim vas da na tom aktu kada bude došao na Vijeće predlagač i obrađivač bude Karić Emira. Ako moram ići preko komisija i službi, znači to je moj akt i neka piše predlagač i obrađivač Karić Emira i nije nikakav problem.“

Kemal Bratić, općinski načelnik: „I ja bih sve pozdravio i zaželio uspješan rad. Vidim da je atmosfera dobra za rad i da su vijećnici raspoloženi za današnju sjednicu. Želim da iskoristim priliku i da odmah odgovorim na postavljeno pitanje uvaženog vijećnika Skopljaka. Želim da kažem svoje mišljenje, a mislim da će se i građani složiti sa mnom kada se radi o tome što ste spomenuli da je sve izmješteno. Mislim da je cilj svih nas, a samim tim i cilj naših građana da su službe smještene na jednom mjestu. Ako vi mislite da je to drugačije mi ćemo to napraviti ponovo i u svaku mjesnu zajednicu prebaciti po jednu službu, da bi službe bile raštrkane, pa da građanin ode u jednu mjesnu zajednicu, pa da ode u drugu da ovjeri, pa ode u treću i da ih tako vrtimo u krug. Govorim o urbanizmu, kada smo ga preselili mislim da je to jedan od najboljih poteza prošlog saziva Vijeća i mene kao načelnika, jer smo službu stavili pod jedan krov i građanima omogućili da kada dođu u općinu da mogu sve završiti na jednom mjestu, a ne da se vraćaju od tačke A do tačke B, da ovjeravaju, da uplaćuju, pa vraćaju itd. Bilo je tu određenih problema, koje ja ovdje neću iznositi, jer se ta služba ponašala kao država u državi. Tako da smo to uradili iz više razloga i mislim da je to sada u redu i da ima manje problema u toj službi

koja je izuzetno kompleksna. Kada se radi o ovom pomenutom ja to doživljam kao neku prijetnju i želim da kažem da se ovdje niko nikoga ne boji i vi poduzimajte šta god hoćete, ali nemojte mahalisati i donositi zaključke bez toga da provjerite. Vi ste to već doživjeli da je to tako urađeno i ja ovdje odgovorno tvrdim da je taj potez napravljen radi adaptacije objekta. Postoji zakon, a na kraju kraja krajeva nije načelnik nadležan za to. Vi bi trebali znati kao vijećnik u drugom mandatu da je to isključiva nadležnost Općinskog vijeća, jer Vijeće je donijelo odluku o matičnim područjima i rečeno je da imaju dva matična područja i ne može to načelnik uraditi. Međutim vi ste već donijeli da je to završena stvar i da je to načelnik uradio i evo stavili ste zvono i već pričate o tome. Vi ste vjerovatno jedan od kolovođa koji to rade. Ja ovdje tvrdim da je jedini razlog radi adaptacije prostora, jer to traže zakonski propisi i ako niste znali da između ostalog mora da bude uredno, da mora da bude kamera, da moraju da budu određene stvari, jer nam je inspekcija naložila da moraju biti određene stvari i matični ured će biti tamo sve dok ovo Vijeće ne donese drugačiju odluku. Ja vas molim nemojte po mahalama donositi zaključke i odluke, jer ovo je mjesto gdje se donose i zaključci i odluke kada se radi pogotovo o tom pitanju.“

Kemal Skopljak, predsjednik kluba vijećnika SBB-BPS: „ Prvo nije to nikakvo mahalanje, kako vi kažete, to je činjenično stanje. Ja skrećem samo pažnju da se ne bi desilo kao i sa ove četiri službe. Znači ako ima neka promjena, ako se služba trenutno zatvara zbog nečega onda treba objasniti na vrijeme, a ne kada se nešto desi i pokrene, onda vi izađete za govornicu i kažete to je tako i tako. Znači, ja ne govorim ovo bez veze, govorim zato što smo to već doživjeli.“

Kemal Bratić, općinski načelnik: „Vi bi trebali znati da to nije služba i da u općini Doboj Istok postoje četiri službe. Trebali bi znati da je to matični ured koji je radio dva puta sedmično da bi građanima omogućili lakši pristup. Hoću da vam kažem, da je prosjek tamo pet ljudi kada je matičar prisutan. Da li nam se isplati i to? To je za neko razmišljanje. Ono što tvrdim sada jeste da je jedini razlog adaptacija prostora i ako niste dugo bili tamo evo zadužit ćemo nekoga da ode sa vama i da to vidite. Jeste mahalanje, jer se to već objavilo na nekim fejbuk stranicama. Vi i vjerovatno neki vaši saradnici koji isključivo sjede ne sećijama, ništa drugo ne rade, nisu nikada ništa radili na općini, imali su to radno mjesto, držali pečate i radili to što su radili, što nisu trebali da rade i sada im je jedini problem zašto nema matičara. Ima ljudi koji ovdje sjede i koji znaju kakva je to služba i kakva je to odgovornost i šta se sve radilo i šta su ti ljudi koji su sada najveći zagovornici, jer jednu heftu ne radi matičar i kraj je svijeta. Kako ostali građani u drugim općinama gdje su smješteni matični uredi samo na jednom mjestu. Razlog za sadašnji prestanak rada je adaptacija prostora, tačka.“

Refik Šuvalić, vijećnik SDA: „ Poštovani predsjedavajući, zamjeniče, načelnice, uvažene kolegice i kolege, pomoćnici, dragi gosti mene su počele neke stvari malo boljeti sa ovakvim nastupima. Ja ne znam šta bi trebali uraditi građani Doboj Istoka kada se formirala srednja škola u Velikoj Brijesnici, MUP u Velikoj Brijesnici i evo građani Klokočnice najavljuju da će napraviti mnogo šta, jer nemamo banke. Nisu to samo reakcije od građana Klokočnice, nego iz Brijesnice jedne i druge i ostalih mjesta, jer ja mislim da nigdje ni na jednoj općini nema tolike gužve da narod po kiši stoji i pravi cirkus. Nažalost sve su banke privatne i kada ćemo mi kao društvena zajednica, kao ljudi koji smo na čelu ovih građana uraditi nešto po tom pitanju. Prema tome nemojte da stvaramo nepotrebne tenzije, jer uglavnom uzročnici budemo mi pojedinci koji bez dovoljno argumenata ulazimo u koje kakve rasprave, a ne provjerimo određene informacije. Znači to su stvari koje ne prave zdravu atmosferu. Mi imamo rezultata sa kojima se sigurno možemo pohvaliti da nam mnogi zavide, a ovakve stvari nas samo vuku unazad. Sljedeće, ja mislim da je glavni razlog, obzirom da sam ja predsjednik Komisije za statut, po pitanju ovih inicijativa, znamo da su većinom iskrene, ali bude i onih populističkih, ali da te inicijative uvijek iziskuju novčana sredstva. Znači, dajte prilikom pripreme budžeta ili rebalansa budžeta da te stvari rješavamo kada je to u pitanju. Slažem se za neke inicijative da trebamo i pošto sam ja na čelu te komisije i kada budemo radili da ne idemo tražiti nešto nemoguće. Znamo šta je budžet, a isto tako imamo i rebalans budžeta i da to mnogo više, bez obzira ko je u poziciji, a ko u opoziciji, probamo izboriti, jer svi mi živimo ovdje, mala smo sredina i znamo šta su stvarni problemi. Rijetkost je bila da

se ili ne radi ili se ne planiraju raditi određene stvari koje budu kao inicijative. Stoga vam molim, zreli smo ljudi i da ne unosimo određene tenzije oko samog funkcinisanja i rada. Ja mislim da svi imamo želju da građanima bude što bolje, a u krajnjem mi svi zbog toga ovdje da stvaramo što bolje uslove i ambijent za život na ovoj općini.“

Emira Karić, predsjednica kluba vijećnika SDP: „ Gospodine načelnice, ja bih dala repliku kada je u pitanju mahalanje. Poštovani vijećnici vi znate da smo donijeli Odluku o satu sa građanima koja bi se, po meni, trebala realizirati svaki mjesec i na koji bi građani dolazili i transparentno bi im se objašnjavalo, odnosno odgovaralo na postavljena pitanja. Ta se odluka dugi niz godina ne realizira, a to je upravo ta pozitivna stvar gdje bi građanin došao, a ovako možda i vijećnik kao građanin, kojem bi se omogućilo da postavlja određena pitanja, a službe i oni koji su odgovorni da odgovaraju na ta pitanja. To je stvar koju ja nikako, da kažem, ne mogu halaliti sadašnjoj vlasti, jer bili su to vijećnički sati kada smo išli po mjesnim zajednicama i imalo je to određenog efekta. Mislim da su građani, budući da nemamo ni medija, zaista evo upravo rekla kazala i moraju se oslanjati na nečije razgovore, odnosno neko ko manje zna ili ko više zna. Kažem da je jedna od mogućnosti transparentnosti rada upravo ta odluka o održavanju sata sa građanima. Refik, i vama bi određene stvari replicirala, bila vam je dobra diskusija, međutim morate se vratiti unazad i vidjeti ko je zaslužan za ovakav lokalizam na području općine Doboj Istok. Ja mogu reći došla sam iz neke druge sredine i poznajem neke druge sredine i uvjeravam vas da je ovdje lokalizam jedna od gorućih, ružnih tačaka. Zna se odakle mora biti načelnik, zna se odakle mora biti predsjedavajući, kvota vijećnika itd. Postavite pitanje ko je zaslužan za taj lokalizam unazad godina i godina. Čak je nekada lokalizam gori od patriotizma ili nacionalizma na području naše općine. Što se tiče inicijativa mi imamo period od mjesec dana da nešto, a evo imamo tačku dnevnog reda gdje će biti rebalans budžeta, a to je točka 2. i to je uredno, znači neko je došao povodom tačke 2. i mora se ekonomski kod ostale nepomenute usluge i dadžbine gdje će se iskoristiti taj kod, pa tako i mi vijećnici nekada ćemo doći na neku ideju, pa iskoristiti određene kodove i sve će biti transparentno i jasno.“

Izet Hodžić, zamjenik predsjedavajućeg Općinskog vijeća: „ Poštovani predsjedavajući, uvažene kolege i kolegice vijećnici, poštovani načelnice sa saradnicima, poštovani gosti ja koristim priliku pošto se prvi puta javljam da pozdravim i da poselamim sve prisutne i da svima zaželim sretan i uspješan rad na današnjoj sjednici Općinskog vijeća. Jednostavno ne mogu da prešutim neke stvari, a tako je to uopšte i u životu, a u politici pogotovo. Opozicija ima pravo da kritikuje rad pozicije i to je sasvim ispravno i u redu, ali da neke stvari, polazim od sebe, pa sugerišem i drugim da rasčistimo. Stvari zbog kojih sam se najviše javio, ja se u potpunosti slažem i zalagao sam se u prethodnim sazivima kada je bio vijećnički sat i davao sam maksimum i bio sam, odgovorno tvrdim, na svakom vijećničkom satu koji me je sledovao. Da li je taj vijećnički sat imao nekog uspjeha ili nije o tom potom i to bi se dalo analizirati i to bi trebale službe Općinskog vijeća da analiziraju. Hoću da kažem da nije u redu izaći za govornicu i kritikovati, jer Općinsko vijeće donosi program rada Općinskog vijeća i niko nije ni od opozicije ni od pozicije imao sugestija na planirani program rada Općinskog vijeća. To je isključiva nadležnost Općinskog vijeća i znam da je bilo u prethodnim planovima i programima rada Općinskog vijeća gdje koji vijećnik ide u koju mjesnu zajednicu. Predsjedavajući ili zamjenik su bili obavezni i dva vijećnika i ja ću reći svoje mišljenje, ako neko smatra drugačije bujrum evo govornica i ne moramo završiti sjednicu za 8,5 minuta može trajati i pola sata. Kažem nismo to uvrstili, a da li se ja slažem ili ne slažem, jer ne može nama Crveni krst općine Doboj Istok preporučiti ili neko drugi. Znači to je izričita nadležnost Općinskog vijeća i općinski vijećnici učestvuju u tome, jer sam naziv kaže vijećnički sat. Možda sam ja glavni krivac što se ne održava taj vijećnički sat? Govorim metaforički, ali Općinsko vijeće je to koje je nadležno za sprovođenje toga. Ja odgovorno tvrdim nismo to uvrstili u plan i program Općinskog vijeća, niti je bilo kakvih primjedbi, niti amandmana ni od jednog političkog subjekta koji je zastupljen u Općinskom vijeću Doboj Istok.“

Hasan Hasančević, predsjednik kluba vijećnika SDA: „ Vidite kako mi dolazimo do rješenja kroz diskusiju ovdje, a nismo otišli na vijećnički sat. Da bih ja kao opozicija ili pozicija imao informaciju ili

uradio nešto za građane moram ja svoj ponos svoj ego spustiti i doći i do načelnika i u službu i informisati se za bilo šta šta građani traže. Ja imam kao vijećnik svako jutro kahvu sa građanima, svako jutro 15 do 7 i dobijem milion informacija koje mi trebaju. Ne trebaju meni nego trebaju za boljitak građana Doboj Istoka i kada dobijem tu informaciju dođem u službu, isprovjeravam i probam popraviti na bilo koji način. Odem općinskom načelniku kao „vlast“ kao što bi mogle i kolege iz opozicije, dobro jutro, dobar dan, selam alejkum imam problem i to je to. Međutim, šta je problem? Problem je da ja dođem do načelnika. I ja moram kao pozicija doći do načelnika i završiti sve i inicijativu i vijećničko pitanje i sve moguće probleme koji se dešavaju na općini Doboj Istok kod načelnika i u općinskim službama. Nema drugog puta gospodo, kolege ili kolegice, kako hoćete, to je put boljotka i zato smo tu, a ne izaći, neću reći populistički ili nepopulistički, ovdje pričati. Puno je u ovoj državi prodavanja magle, pa tako i u Doboj Istoku. Svi su nešto sposobni pričati kada izađemo, a ne možemo priredbu napraviti kako treba u osnovnim školama ili na drugim mjestima, a da o nečem drugom pričamo. Molim vas sve da konkretiziramo prijedloge i stvari koje su za dobrobit ovih građana i da idemo raditi, a ovo ostalo je prodavanje magle.“

Izet Hodžić, zamjenik predsjedavajućeg Općinskog vijeća: „ Postavljeno je jedno vijećničko pitanje, načelnik je odgovorio na to vijećničko pitanje i ja smatram da treba da se držimo dnevnog reda, ništa drugo. Znači bilo je jedno vijećničko pitanje, odgovor je uvaženi kolega Skopljak dobio na to pitanje i to je to.“

Kemal Skopljak, predsjednik kluba vijećnika SBB-BPS: „ Želim samo da pitam uvaženog kolegu Refika, sve se slažem, sve je u redu, međutim glavnu stvar niste spomenuli. Od nas iz opozicije ovih šest godina koliko sam ja ovdje ni jedan jedini amandman nije prošao na budžet. Vijećnička inicijativa naravno da mora biti potkovana i obrazložena finansijskim dijelom, međutim kakvu mi mogućnost imamo prilikom kreiranja budžeta? Nikakvu. Sve amandmane koje smo uložili ni jedan jedini nije prihvaćen.“

Emira Karić, predsjednica kluba vijećnika SDP: „Moram zaista kolegi Izetu, vi govorite o vijećničkom satu, a on je ukinut i zato vam je diskusija bila uzaludna. Mi smo donijeli Odluku o organizovanju sata sa građanima i tu treba da budu službe, a ne znam da li su službe upoznate sa tim. Tako da to ne ide u Program rada Općinskog vijeća. Zaboravili ste na Odluku o satu sa građanima koju moraju službe provoditi, a da li ćemo mi vijećnici biti ili nećemo to je naša individualna stvar.“

Izet Hodžić, zamjenik predsjedavajućeg Općinskog vijeća: „Uvaženom kolegi Skopljaku moram reći, jer možda mu bude lakše, ja sam u toj poziciji i ni jedan moj prijedlog nije uvršten u budžet evo osam godina. Znači ni jedan moj lični prijedlog nije uvršten u budžet, a u poziciji sam.“

Kemal Bratić, općinski načelnik: „ Možda treba napraviti edukaciju za amandmane, kako da se pišu amandmani. Hoću da kažem da ja ne znam za ovaj sat sa službama i prvi puta čujem ovo što uvažena vijećnica govori. Vi trebate znati da su u službama svaki dan građani, da su i kod načelnika svaki dan građani i ne trebamo mi nekakve sate određivati. Lijepo stoji na ulaznim vratima od kada do kada je radno vrijeme i mi smo na raspolaganju našim građanima čitav dan, a naravno znamo ostati i poslije radnog vremena ukoliko neko nešto treba, pa čak radimo i vikende i bajrame i druge praznike. Znači stojimo na raspolaganju našim građanima. Ja ne znam za ovu odluku, a vi ste bili jedan od inicijatora da se ukine taj vijećnički sat. Bio sam na tom Kolegiju i vi ste bili jedan od inicijatora da se ukine taj vijećnički sat i vjerovatno ste dobro procijenili zašto treba taj vijećnički sat ukinuti, jer nije bio posjećen.“

Nusret Dautović, predsjedavajući Općinskog vijeća: „Ima li još neko nešto po vijećničkim pitanjima? Ukoliko nema, zatvaram diskusiju.“

USVAJANJE DNEVNOG REDA

Nusret Dautović, predsjedavajući Općinskog vijeća: „ Za današnji dnevni red predviđeno je šest tačaka dnevnog reda i to:

1. Razmatranje i usvajanje Prijedloga Odluke o dodjeli općinskih priznanja,
2. Razmatranje i usvajanje Prijedloga Odluke o dopuni Odluke o dopunskim pravima korisnika socijalne zaštite,
3. Razmatranje i usvajanje Prijedloga Odluke o izmjenama i dopunama Odluke o donošenju Regulacionog plana stambeno-poslovne zone na lokalitetu Duja u Lukavici Rijeci,
4. Razmatranje i usvajanje Prijedloga Odluke o davanju prethodne saglasnosti JKP „ČISTO“ d.o.o. Doboj Istok za izmjenu i dopunu Odluke o visini komunalnih naknada na području općine Doboj Istok,
5. Razmatranje i usvajanje Programa obilježavanja Dana nezavisnosti BiH i Dana općine Doboj Istok,
6. Razmatranje i usvajanje Izvještaja o realizaciji Programa rada Općinskog vijeća Doboj Istok za 2022. godinu.

Ko je za ovakav predloženi dnevni red?

Glasanje: ZA – 16, PROTIV – 0, UZDRŽANIH – 0.

REALIZACIJA DNEVNOG REDA

1. Razmatranje i usvajanje Odluke o dodjeli općinskih priznanja.

Nusret Dautović, predsjedavajući Općinskog vijeća: „ Dobili ste materijal. Javlja li se neko za riječ po ovoj tački?“

Kemal Skopljak, predsjednik kluba vijećnika SBB-BPS: „U svakom slučaju podržat ću ovakav izbor. Mislim da su ljudi koji su predloženi zaslužili ova odlikovanja i želim da izrazim svoju podršku tome.“

Nusret Dautović, predsjedavajući Općinskog vijeća: „ Javlja li se još neko za riječ? Ukoliko se niko ne javlja ko je za ovakav prijedlog Odluke?“

Glasanje: ZA – 16, PROTIV – 0, UZDRŽANIH – 0.

2. Razmatranje i usvajanje Prijedloga Odluke o dopuni Odluke o dopunskim pravima korisnika socijalne zaštite.

Nusret Dautović, predsjedavajući Općinskog vijeća: „ Stavljam tačku na raspravu, javlja li se neko za riječ? Ukoliko se niko ne javlja ko je za ovakav prijedlog Odluke?“

Glasanje: ZA – 16, PROTIV – 0, UZDRŽANIH – 0.

3. Razmatranje i usvajanje Prijedloga Odluke o izmjenama i dopunama Odluke o donošenju Regulacionog plana stambeno-poslovne zone na lokalitetu Duja u Lukavici Rijeci.

Nusret Dautović, predsjedavajući Općinskog vijeća: „ Javlja li se neko za riječ po ovoj tački? Ukoliko se niko ne javlja ko je za ovakav prijedlog Odluke?“

Glasanje: ZA – 16, PROTIV – 0, UZDRŽANIH – 0.

4. Razmatranje i usvajanje Prijedloga Odluke o davanju prethodne saglasnosti JKP „ČISTO“ d.o.o. Doboj Istok za izmjenu i dopunu Odluke o visini komunalnih naknada na području općine Doboj Istok.

Nusret Dautović, predsjedavajući Općinskog vijeća: „ Javlja li se neko za riječ po ovoj tački? Ukoliko se niko ne javlja ko je za ovakav prijedlog Odluke?

Glasanje: ZA – 16, PROTIV – 0, UZDRŽANIH – 0.

5. Razmatranje i usvajanje Programa obilježavanja Dana nezavisnosti BiH i Dana općine Doboj Istok.

Nusret Dautović, predsjedavajući Općinskog vijeća: „ Javlja li se neko za riječ po ovoj tački? Ukoliko se niko ne javlja ko je za ovakav Program?

Glasanje: ZA – 16, PROTIV – 0, UZDRŽANIH – 0.

6. Razmatranje i usvajanje Izvještaja o realizaciji Programa rada Općinskog vijeća Doboj Istok za 2022. godinu.

Nusret Dautović, predsjedavajući Općinskog vijeća: „ Javlja li se neko za riječ po ovoj tački? Ukoliko se niko ne javlja ko je za ovakav Izvještaj?

Glasanje: ZA – 16, PROTIV – 0, UZDRŽANIH – 0.

Sa ovom tačkom završavamo današnju sjednicu Općinskog vijeća, zahvaljujem se svima i vidimo se sljedeći put.“

Sjednica je završena u 10,35 sati.

ZAPISNIČAR
Behara Hadžić

SEKRETAR OPĆINE
Omer Hadžić

PREDSJEDAVAJUĆI
OPĆINSKOG VIJEĆA
Nusret Dautović

Zapisnik je usvojen na 24. redovnoj sjednici Općinskog vijeća Doboj Istok održanoj dana 23.02.2023. godine.

U Klokočnici, dana 23.02.2023. godine

Zabilješku sačinio
Omer Hadžić, sekretar Općine